

27 OCT 2001

DR MAHATHIR ANGGAP PERTEMUAN BERSAMA BUSH SBG MESRA

PETALING JAYA, 27 Okt (Bernama) -- Perdana Menteri Datuk Seri Dr Mahathir Mohamad menanggapi pertemuannya dengan Presiden Amerika Syarikat George W. Bush di Sidang Kemuncak Kerjasama Ekonomi Asia Pasifik (Apec) di Shanghai, China baru-baru ini sebagai mesra.

"Kami serasi antara satu sama lain. Ia (pertemuan itu) tidaklah serius sepanjang masa. Kadang-kadang saya ada juga menyelitkan beberapa jenaka tetapi saya tidak ingat tentang apa," kata Dr Mahathir demikian apabila diminta mengulas kenyataan pegawai-pegawai Amerika bahawa Bush tertarik dengan jenaka-jenaka beliau.

"Ia bukanlah satu pertemuan yang begitu rasmi walaupun kami ada berbincang beberapa perkara serius. Saya rasa beliau (Bush) sangat mesra," katanya kepada pemberita di sini, hari ini, selepas pulang daripada kunjungan selama sembilan hari ke Korea Selatan dan Jepun selepas sidang Apec itu.

Dr Mahathir menganggap mesyuarat Kerjasama Ekonomi Asia Pasifik (APEC) di Shanghai kali ini sebagai suatu yang bermakna.

Beliau berkata anggota-anggota APEC tidak banyak mendesak pada persidangan kali ini dan isu-isu seperti globalisasi, pembukaan pasaran dan tarikh sasaran bagi pembukaan pasaran tidak dibangkitkan.

"Sebaliknya kami banyak berbincang mengenai keganasan dan tentang mustahaknya untuk bekerjasama," dan menambah kata beliau mengusulkan pandangan negara-negara membangun dan keperluan untuk mengguna pakai falsafah "Memakmurkan Jiran".

-- BERNAMA

MSL SHY ZK PR